

欽定四庫全書提要

欽定四庫全書提要卷九十二

集部十四

別集類十三

乾道稿淳熙稿章泉稿

臣等謹案乾道稿淳熙稿章泉稿三集並宋趙蕃撰蕃字昌父號章泉先世鄭州人建炎初其曾祖暘官于信州因家焉蕃以暘致仕恩補官後終于直祕閣蕃始受學劉清之年至五十始問學于朱子朱子文集與蕃尺牘凡六首蕃與朱子往還詩及他作之稱述朱子者亦二十餘首其相契頗深朱子答徐斯遠書有云昌父志操文詞皆非流輩所及且欲其刊落枝葉就日用間深察義理之本然庶幾有所據依以造實地不但爲騷人墨客而已所以期許之者亦甚至然蕃本詞人晚乃講學實未能有所論著其究也仍以詩傳與澗泉韓澆有二泉先生之稱澆集久佚今從永樂大典裒輯已別著錄蕃集亦無傳本而永

樂大典所收頗富併爲採掇編次依舊本標題釐爲乾道稿二卷淳熙稿二十卷章泉稿五卷共計二十七卷而以蕃本傳及劉宰所作墓表附錄于後初蕃爲太和簿時受知于楊萬里萬里贈詩有云西昌主簿如禪僧日餐秋菊嚼春冰又云勸渠未要思舊隱且與西昌作好春又爲作寫真贊云貌恭氣和無月下推敲之勢神清骨聳非山頭瘦苦之容一笑詩成萬象春風云云則其詩派實出江西劉克莊跋亦云近歲詩人惟趙章泉五言有陶阮意所作後村詩話錄其詩頗夥詩人玉屑載蕃論詩一則以陳后山寄外舅詩爲全篇之似杜者後戴式之思家用陳韻又全篇之似陳者觀所品題其淵源亦可概見矣乾隆四十二年六月恭校上

雙溪類藁

臣等謹案雙溪類藁二十七卷宋王炎撰炎字晦叔婺源人乾道五年進士官至軍器少監與淳熙中觀文殿大學士王炎名姓偶同非一人也所著有讀易

筆記尙書小傳禮記論語孝經老子解春秋衍義象數稽疑禹貢辨考工記鄉
飲酒儀諸經考疑編年通紀紀年提要天對解韓柳辨證傷寒論總題曰雙溪
類彙今已無傳惟詩文集僅存仍以雙溪類彙爲名世所行者凡二本一本爲
康熙中其族孫琪所刊凡十二卷一即此本乃明萬歷丙申尙寶司丞王麟得
沈一貫家舊本爲校正開雕者也凡賦樂府一卷詩詞九卷文十七卷炎初與
朱子相契朱子集中和炎寄弟詩有祇今心事同千里靜對簞瓢獨喟然之句
炎亦多與朱子往還之作其交誼頗篤及朱子爲待制侍經筵寧宗方諒闇擇
日開講炎貽書朱子論其非禮而朱子集中無答書蓋是時韓侂冑趙汝愚覺
隙方開汝愚援道學諸人以自助語詳齊東野語侂冑之黨眈眈側目朱子急欲寧宗
親近士大夫故不拘喪禮汲汲以講學爲先實一時權宜之計迨一經攻駁無
可置詞遂付之於不論豈非所持者正雖朱子亦不能與之爭歟其詩文博雅
精深亦具有根柢程敏政輯新安文獻志所採最多而此外議論純粹引據典

確者尙不可悉數蓋學有本原則詞無鄙誕較以語錄爲詩文者固有蹈空徵實之別矣乾隆四十七年五月恭校上

止堂集

臣等謹案止堂集宋彭龜年撰龜年字子壽清江人乾道五年進士歷官煥章閣待制知江陵府遷湖北安撫使坐事落職尋復官以寶謨閣待制致仕卒諡忠肅事蹟具宋史本傳龜年官右史時面折廷諍靡切人主有古直臣之風集中所存奏疏劄子尙五十餘篇敷陳明確多關於國家大計其論光宗不朝重華宮疏凡三四上至於伏地叩額血漬髹髹光宗亦爲之感動又嘗事寧宗於藩邸有舊學之恩即位後數進讜言拳拳懇到因風雷示變極陳小人之竊權及朱子以論韓侂冑被絀龜年又上疏請與同斥今諸疏並在集中其嚴氣正性凜然猶可想見史稱其學識正大議論簡直善惡是非辨析甚嚴故生平雖不以文章名而懇惻之忱與剛勁之氣浩然直達語不求工而自工固非掣輓

爲文者所得絜其長短也宋史藝文志載其集四十七卷世久失傳今從永樂大典所載益以歷代名臣奏議所錄共得文二百二十三首詩二百二十二首依類編次釐爲十八卷雖較原目所存祇十之四而其一生建白之大者已略具於是矣至若祝語諸篇本非文章正軌今刊本概從刪削焉乾隆四十九年十月恭校上

緣督集

臣等謹案緣督集二十卷宋曾丰撰丰字幼度樂安人乾道五年進士官至德慶太守眞德秀幼嘗受學於丰及執政奏取其集入崇文四部當時嘗板行于世歲久不傳元元統間丰五世孫德安購其遺集得四十卷翰林學士虞集爲之敘謂其氣剛而義嚴辭直而理勝有得於易之奇詩之葩其文今見道園學古錄中然當時欲授梓不果至明嘉靖間詹事講始選錄十有二卷刻於宣城卷末有萬錡後序稱摘其尤者存之今觀所分諸體如五言排律類中惟有排

律一二首餘皆五言詩七言排律類中皆七言古詩無一首爲律是古今體且不能辨則其去取乖謬大概可知蓋事講從羅洪先游日以討論心學爲事文章一道非所深研遂使丰之菁華反因此選而散佚殊堪惋惜惟永樂大典編自明初尙見丰之原集其所收錄較刊本多至數倍今據以增補乃哀然幾還舊觀佚而復存亦云幸矣丰仕蹟不顯頗以著述自負集中如六經論之類根柢深邃得馬鄭諸儒所未發其他詩文雖間有好奇之癖要皆有物之言非膚淺者所可企及亦南宋一作者也丰晚年築室自號曰擢齋故是編一名擢齋集見於宋史藝文志今從虞集所序仍以緣督爲名集序稱凡四十卷而宋志乃作十四卷蓋刊刻傳寫誤倒其文今原目不可復睹謹據所存各體以類區分共釐爲二十卷乾隆四十六年十二月恭校上

象山集

臣等謹案象山集二十八卷外集四卷附語錄四卷宋陸九淵撰九淵字子靜

金谿人乾道八年進士紹興初官至奉議郎知荆門軍卒于官事蹟具宋史本
傳據九淵年譜集爲其子持之所編其門人袁燮刊于江西提舉倉司者凡三
十二卷宋史藝文志文獻通考並作象山集二十八卷外集四卷總而計之與
燮所刊本卷數相符獨年譜稱持之所編外集爲六卷殆傳寫訛四爲六歟此
本前有燮序又有楊簡序燮序作于嘉定五年簡序作于開禧元年在燮序前
七年而列于燮後蓋刊板之時以新序弁首故翻刻者仍之又有嘉定庚辰吳
杰跋稱是集爲建安陳氏所刊而年譜未載此本蓋持之偶未見歟前十七卷
皆書十八卷爲表奏十九卷爲記二十卷爲序贈二十一卷至二十四卷爲雜
著二十五卷爲詩二十六卷爲祭文二十七二十八卷爲墓誌墓碣墓表外集
四卷皆程試之文末爲謚議行狀則吳杰所續入也其語錄四卷本於集外別
行正德辛巳撫州守李茂元重刻是集乃并附集末以成陸氏全書其說與集
中論學諸書互相發明合而觀之益足勘證今亦仍附於末不別著錄焉乾隆

五十四年四月恭校上

慈湖遺書

臣等謹案慈湖遺書十九卷附錄一卷宋楊簡撰簡字敬仲慈谿人官至龍圖閣學士事蹟具宋史本傳簡爲陸九齡高弟朱子亦嘗薦之於朝所爲文章以講學爲主不事粉飾其論治務最急者五事次急者八事大旨欲罷科舉以復鄉舉里選限民田以復井田說頗難行而歷官治迹行誼多有可紀者蓋其生平得力有在固非同於空談性命者也本傳載簡所著有甲稿乙稿冠記昏記喪禮家記家祭祀釋菜禮記石魚家記及己易啟蔽等書其目甚多陳振孫書錄解題則稱簡遺書止有三卷此本多十六卷又合附錄爲二十卷多寡俱不相合而集中家記內各條又有別標稱見遺書者疑遺書本其著作之一種各自單行後人因裒輯其甲乙稿等部類成此集而仍以遺書名之非陳氏當日所見之本矣明嘉靖間巡按江西御史秦鉞爲刊行之於世不爲無補焉乾隆

四十七年四月恭校上

絜齋集

臣等謹案絜齋集宋袁燮撰燮字和叔鄞縣人登進士第歷官禮部侍郎寶文閣直學士追諡正獻學者稱絜齋先生事蹟詳宋史本傳燮初與同里沈煥楊簡舒璘以道義相切磋後師事陸九淵得其指授具有原本又少以名節自期立朝屢進讜言所至政績皆可紀在南宋諸儒中可謂學有體用者生平著述有絜齋集二十六卷後集十二卷其目見於馬氏經籍考久佚不傳厲鶚撰宋詩紀事搜討未獲遂并其人而沒之今獨散見於永樂大典中者哀集編次得文二百三十九首詩一百七十七首雖未必盡合原目之數而所存亦云富矣燮詩文淳樸質直不事粉繪而真氣流溢頗近自然其剖析義理敷陳政事亦極剴切詳明足稱詞達理舉蓋儒者之言語無枝葉固未可槩以平近忽之也惟永樂大典內於前後二集標識未明無可辨別謹以類排纂釐爲二十四卷

而以燮子甫所作後序一篇附之用存其舊甫舉嘉定七年進士第一官至兵部尚書以才略顯亦有傳在宋史中蓋能承其家學者云乾隆四十七年二月
恭校上

舒文靖集

臣等謹案舒文靖集二卷宋舒璘撰璘字元質一字元賓奉化人補入太學張
栻官中都璘往從之又從陸九淵朱子呂祖謙諸人游故於性命之旨深有所
窺舉乾道八年進士初授徽州教授擢知平陽縣終宜州通判淳祐中特謚文
靖事迹具宋史儒林傳璘平生未嘗官于朝故集中不著章疏然即尋常酬答
之文亦無不原本于學術本傳謂璘幼授新安作詩禮講解家傳人習自是其
學寢盛今觀集中與陳倉筍子論常平義倉茶鹽保長之法深切時弊皆其教
授新安時所作則璘之成績不特著于學校如宋史所云也又考本傳稱璘釋
褐之後兩除郡教授不就未著其所除者何郡今觀所作先君承議壙銘末有

曰子璘迪功郎信州州學教授則是所稱兩郡之一而史失之者又本傳稱璘爲徽州學官司業汪達首欲薦璘或謂舉員已足達曰吾職當舉教官舍斯人將誰先卒剡薦之今集中有申謝傅漕及張守陳倉三人薦舉筭子又有謝李提舉書乃獨不及汪達其與劉大坊書云前張守所惠薦章蒙示回簡方知所自與王大卿書亦云荷禮書尤丈漕使傅丈倉使陳丈惠然相舉皆出提獎之賜亦均不及達名豈此集猶有佚篇抑或所傳異詞故史與集多有不符歟乾隆四十七年五月恭校上

雲莊集

臣等謹案雲莊集二十卷宋劉燾撰燾有四書問目已著錄燾與弟炳均游朱子之門故嘗上疏乞開僞學之禁爲宋史本傳所採然其上史彌遠書論用人聽言之道及宋史載其奏便民五事論貢舉五弊諸疏尤爲有用之言今書載集中而五事五弊疏集無其文則所缺佚不少矣是集爲祁承燾澹生堂鈔本

前有嘉定間李埴序又附眞德秀碑文乃明天順間其世孫樞所編又別一本爲其十世孫樞所重刻較樞所編少文數首亦不載德秀碑文樞序稱朱子晚年以書屬蔡沈以禮屬燾又稱燾精力在王朝禮編而雜著之文略見于此案朱子以儀禮喪祭二門屬黃幹未嘗屬燾宋史燾本傳既不載此語而王朝禮編亦未見其書不知何所據而云然殆與世傳四書問目同一在疑似之間歟
乾隆四十七年十月恭校上

定齋集

臣等謹案定齋集二十卷宋蔡戡撰戡字定夫其先興化軍仙遊人端明殿學士襄之四世孫也祖紳紹興中官左中大夫始寓常州武進縣戡幼承門蔭補溧陽尉後中乾道丙戌進士甲科官至寶謨閣直學士宋史不爲立傳故其行事不概見凌迪知萬姓統譜載戡持節五羊代輸賦銀民甚便之爲湖南憲有定亂功爲京兆尹歲漕糴艱亟請發廩民賴以濟其敘述頗詳然案集中諸表

啟則又嘗任京西運判廣東運判湖北總領廣西經略淮西總領等官其乞致仕筭子及效白樂天自詠詩中亦頗見其概而迪知均未之及蓋其集久佚不傳故迪知莫能考也集本四十卷乃紹定三年其季子戶部郎官總領四川財賦虞所刊眉山李埴爲序見於陳振孫書錄解題今據永樂大典所載者蒐採彙集並從歷代名臣奏議得所未載者二十篇互相訂正釐爲二十卷較諸原目十殆得其五矣埴序稱戡鯁挺不阿屢更繁劇宣力四方無不殫盡汔以全節始終今觀集中所上奏筭條列明確類皆侃直忠亮爲經世有用之言其論邊事專以嚴備自守爲主而不汲汲於和戰紛爭遠慮深謀亦非好事偷安者所可幾及方之同時名臣實龔茂良之流亞惜史家不備其生平幾至湮沒今幸遺集復彰尙得以考見大略謹旁採紀傳於人名事實有可稽核者悉爲參互證明庶以補宋史之闕漏焉乾隆四十六年九月恭校上

九華集

臣等謹案九華集二十五卷附錄一卷宋員興宗撰興宗有采石戰勝錄已著錄其集見于焦竑國史經籍志者本五十卷乃寶慶三年其孫榮祖所編興宗弟夢協并研李心傳俱爲之序明以來久佚不存今檢勘永樂大典所錄摭拾詮次釐爲詩六卷雜文十五卷又論語解老子解略西陲筆略併紹興采石大戰始末各一卷而原集所載同時祭文可以互證興宗始末者則別爲一卷附之於後集中多與張栻陸九淵往復書簡蓋亦講學之家然所上奏議大抵毅然抗論指陳時弊多引繩批根之言李心傳序謂歸附旣留而垂遣暫御因逐而旋召均輸久廢而驟復此三事皆朝廷所必行而興宗矢筆盡言斥逐不悔則其經濟氣節均有實事非徒侈空談者矣又洪适撰隸釋時嘗咨以漢碑數事興宗爲之考核源委具見精博今答書一通具在集中學問淹雅亦未易及雖其文力追韓柳不無鍾鍊過甚之弊然骨力峭勁要無南渡以後冗長蕪蔓之習挺然一作者也乾隆四十六年四月恭校上

野處類藁

臣等謹案野處類藁二卷宋洪邁撰邁以才學瞻博雄視一時所著容齋隨筆夷堅志唐人萬首絕句俱別著錄其文集見于宋藝文志者有野處猥藁一百四卷瓊野錄三卷而陳振孫書錄解題祇載有此集二卷且云全集未見則當時傳播已稀惟明張萱內閣書目有野處內外集九冊無卷數當即全集中不完之本流傳僅存者今亦已散佚無可考世所行邁集獨有此本而已集前有邁自序稱甲戌之春家居臥病作詩若干首以自當緩憂之一物遂取曩時所存而未棄者錄爲二卷甲戌爲高宗紹興二十四年蓋邁退居鄱陽時所作而集中謁曾照塔詩又有庚戌紀年當在建炎三年相去已二十四五歲僅得詩八十餘首又容齋三筆紀紹興十九年在福建貢院與葉晦叔所作詩正在甲戌之前而集中並未載入疑本就篋笥所貯偶然裒輯故所錄闕略如此然其生平韻語惟藉此以考見大概則零珪斷璧未嘗不足存備一家也又案馬端

臨經籍考載此書入別集類然集中有詩無文依端臨之例宜入詩集類而舛錯誤收殆亦未見此本歟乾隆四十七年五月恭校上

盤洲文集

臣等謹案盤洲文集八十卷宋洪适撰适有隸釋已著錄許及之撰适行狀稱有文集一百卷藏於家周必大撰适神道碑則稱其論著爲四方傳誦有盤洲集八十卷與行狀互異考陳振孫書錄解題張萱重編內閣書目俱作八十卷則及之所稱其家藏之全稿必大所稱乃其行世之刊本也其書流傳頗尠王士禎居易錄謂朱彝尊所藏盤洲集僅有其詩則藏書家已罕覩全帙此本爲毛氏汲古閣所藏猶從宋刻影寫惟末卷筍子第三篇蠹損特甚其餘雖字句間有脫落而卷帙完好亦古本之僅存者矣适以詞科起家工於儷偶其弟邁嘗舉所草張浚免相制王大寶致仕制浙東謝表生日詩詞謝啟諸聯載於容齋三筆然考适自撰小傳自其少時擬復得河南賀表即有齊人歸鄆謹之田